

INUIT ATAQATIGIIT

Inatsisartuni



10.01.2019

Inatsisartut Suleriaasianni § 37 imm. 1 naapertorlugu Naalackersuisunut apeqquut imaattoq matumuuna saqqummiuppara.

Naalackersuisunut apeqquut:

1. Ukiuni kingullerni tallimani Nuna tamakkerlugu aalisakkanik tunisassiorfiit matoqqatinneqarneranni aalisarnermik inuussutissarsiuteqartut aammalu tunisassiorfimmi sulisut angerlartiinnarneqartarneri qanoq amerlatiginersut kisitsisinngorlugit Naalackersuisut paasissutissiisinnaappat? Suna pissutigalugu angerlartiinnarneqartarpat?
2. Ukiuni kingullerni tallimani tunisassiorfinni sulisut angerlartiinnarnerisigut pisortat ikiorsiissutai eqqarsaatigalugit qanoq annertutigisumik aningaasartuutaasimanerat pillugu Naalackersuisut paasissutissiisinnaappat?
3. Nuna tamakkerlugu aalisakkanik tunisassiorfiit matoqqatinneqarnerisa nalaanni aalisarnermik inuussutissarsiuteqartut tunisassiorfimmilu sulisut angerlartiinnannginnissaat unittuunnginnissaallu qulakkeerniarlugu Naalackersuisut periusissiaqarpat?
4. Siunissami Nunatsinni tunisassiorfinni sulisut angerlartiinnartannginnissaat qulakkeerniarlugu Naalackersuisut qanoq suliniuteqarniarpat?
5. Siunissami Nunatsini tunisassiorfiit pissuteqarlutik matoqqatinneqarnerisa nalaanni aalisarnermik inuussutissarsiuteqartut aalaakkaasumik inuussutissarsiorsinnaanissaat qulakkeerniarlugu Naalackersuisut qanoq pilersaaruteqarpat?

(Inatsisartuni ilaasortaq Aqqa Samuelson, Inuit Ataqatigiit)

Tungavilersuut:

Nunatsinni aalisakkanik tunisassiorfiit ukiuni kingullerni pissuteqarlutik matoqqatinneqartarput. Aalisakkanik tunisassiorfiit matoqqatinneqarnerisa nalaanni aalisarnermik inuussutissarsiuteqartut aammalu tunisassiorfimmi sulisut angerlartiinnarneqartarnerat susassaqtunut toqqissisimannginnermik inuussutissarsiummillu toqqammavissaaruttut misigisimanermik kinguneqartarput.

Aalisakkanik tunisassiorfiit matoqqatinneqarnerisa nalaanni aalisarnermik inuussutissarsiuteqartut aammalu tunisassiorfimmi sulisut Nuna tamakkerlugu assigiinngitsumik periuseqarfigineqartarnerat takornartaanngilaq. Ilaannikkut pisariaqartitsineq naapertorlugu tunisassiorfiit matoqqatinneqarnerisa nalaanni aalisarnermik inuussutissarsiuteqartut aammalu

tunisassiorfimmi sulisut pikkorissaanertut siunertaqartumik suliniuteqarfigineqartarput pisortat ikiorsiissutaannik tunniussiinnannginnissaq anguniarlugu.

Aalisakkanik tunisassiorfiit matoqqatinneqarnerisa nalaani aalisarnermik inuussutissarsiuteqartut aammalu tunisassiorfinni sulisut angerlartiinnartarnerisa kingunerisaanik, allatigullu aaqqiisoqarsimatinnagu isumaginninnermi pisortat ikiorsiissutai tunniunneqarsimasut qanoq annertutiginersut paasisaqarfigerusuppakka.

Siunissaq eqqarsaatigalugu tunisassiorfinni sulisut angerlartiinnartannginnissaannut suliniutit suuneri itisilinerusumik paasisaqarfiginissaat soqutiginaateqarpoq, aalisartut, piniartut tunisassiorfinnilu sulisut pitsaanerpaamik inuussutissarsiuteqarnerisa toqqammavissinneqarnissaat pinngitsoorneqarsinnanngimmat.